

## Mál nr. 4

### Knattspyrnufélagið Fram gegn Ungmennafélaginu Grindavík

**Kæra Fram**

**Dómkröfur**

Þess er krafist að kæranda verði dæmdur sigur með markatölunni 3-0 í leik Fram og Grindavíkur í U23 B-deild, dags. 24. maí 2005.

#### Málsatvik, málsástæður og lagarök

Þann 24. maí 2005 fór fram leikur á milli Fram og Grindavíkur í U23 liði B deild á Framvelli. Leiknum lauk með jafntefli 1-1. Samkvæmt meðfylgjandi leikskýrslu virðast tveir leikmenn kærða ekki hafa leikheimild með kærða þegar leikurinn fór fram. Þetta eru leikmennirnir Mario Mijatovic, kt. skráð 251080 og Mathias Jack, kt. skráð 150269. Þar sem ofangreindir leikmenn höfðu ekki leikheimild hjá kærða þá telur kærandi að um skýrt brot á hlutgengisákvæði reglugerðar KSÍ um knattspyrnumót, 1. mgr. greinar 1.2. sé að ræða, um að hlutgengir til þátttöku í knattspyrnumótum eru leikmenn sem eru félagar í því félagi sem þeir keppa með og uppfylla ákvæði reglugerðar KSÍ um félagaskipti leikmanna og stöðu félaga og leikmanna. Kærandi telur að ofangreindir leikmenn fullnægi ekki skýrum skilyrðum þessarar greinar, þar sem þeir eru ekki félagar í kærða og fullnægja ekki ákvæðum fyrrnefndar reglugerðar. Af fyrrnefndum sökum telur kærandi að lið kærða hafi mætt ólöglega skipað til leiks og með vísan til 1. mgr., greinar 4.3. í 4. kafla reglugerðar KSÍ um knattspyrnumót þá telst kærði hafa tapað leiknum með markatölunni 0-3. Með vísan til ofagnreinds telur kærandi að dæma beri honum sigur í leik gegn kærða í U23 liði B- deildar með markatölunni 3-0.

#### Gögn

Afrit leikskýrslu

#### Áskilnaður

Kærandi áskilur sér rétt til að kalla vitni til skýrslutöku ef málatilbúnaður kærða gefur tilefni til ásamt því að koma fram með frekari gögn, málsástæður og lagarök.

f.h. Knattspyrnufélagsins Fram

Brynjar Jóhannesson, framkvæmdastjóri

#### Greinargerð Grindavíkur

Okkur er og var það ljóst að við spiluðum með ólöglega menn í þessum umrædda leik og ætlum við ekki að halda uppi neinum vörnum vegna þess heldur eingöngu skýra hvers vegna við gerðum þetta vísvitandi.

Við höfðum samband við Fram og KSÍ fyrir leik og sögðum frá því að við hefðum hug á því að fá að nota tvo menn sem ekki voru komnir með leikheimild, KSÍ sagði að þeir myndu ekkert gera nema það kæmi kæra frá félaginu og því var haft samband við félagið og farið fram á það að þessir menn fengju að spila (eða með öðrum orðum hvort það væri eitthvað mál þeirra vegna) þarna var talað við Brynjar Jóhannesson framkv.stj. félagsins, sem sagði að þetta yrði ekkert mál og í raun bara gott þar sem menn myndu fá betri leik! En svo talaði Brynjar aftur við undirritaðan og tjáði honum að formaður félagsins væri mikill "prinsipp" maður í þessum efnum og gæti varla horft framhjá því að kæra leikinn ef hann ekki ynnist! Sjálfur talaði ég við Steinar og staðfesti hann mér það sama og Brynjar hafði sagt mér. Gerðum við okkur grein fyrir því að til þessa gæti komið en við ákváðum samt að mæta og spila þennan leik því það var afar mikilvægt fyrir okkur að því leyti að við vorum að ákveða hvort samið yrði við Mijatovic (sem var ekki gert vegna frammistöðu hans meðal annars í þessum leik) og einnig mikilvægt að koma Mathias Jack í smá tengingu við leik á Íslandi en hann lenti 1½ klst fyrir leik og fékk keppnisleyfi daginn eftir.

Fyrir okkur í Grindavík er þessi keppni afar mikilvæg að við teljum, því hún er búin til fyrir leikmenn sem eru að koma upp úr meiðslum, þá sem eru ekki í byrjunarliði og síðast en ekki síst til þess að

stækka verkefni 2. flokks. Það er spurning hvort ekki mætti gefa út tækifærisleyfi í svona tilfellum því auðvitað er það einnig mikilvægt að það sé hægt að skoða leikmenn sem eru að koma þegar mót er hafið. Eins og þið sjálfsgagt vitið hefur Grindavíkurlíðið lent í miklum áföllum og er með marga menn meidda. Því hvarflaði það að okkur eitt augnablik að fara sömu leið og Framarar síðasta keppnistímabil að draga lið okkar úr keppni og verða þar af leiðandi valdir af því að þessi keppni yrði að engu, líkt og hún var í fyrra.

Niðurlag okkar er á þá vegu að við gerum okkur grein fyrir því að við breyttum ekki rétt, en engu að síður teljum við okkur ekki hafa haft um margt að velja, þ.e.a.s. þetta voru tveir slæmir kostir – annars vegar að draga lið okkar úr keppni eða spila þessum mönnum. Það má ekki gleyma fyrir hverju þessi keppni stendur - þetta er í raun varaliðskeppni aðalliðs félagsins og því verða menn að meta það hverju sinni hvað því er fyrir bestu en þó ekki gleyma að gera U23 keppninni hátt undir höfði sem ég tel okkur Grindvíkinga hafa gert frá upphafi! Við vonum við að niðurstaða dómstóls KSÍ verði sú að við verðum áminntir með trú um að þetta þurfi ekki að koma fyrir aftur.

Virðingarfyllst,

f.h. Knattspyrnudeildar Grindavíkur

Ingvar Guðjónsson, framkvæmdastjóri

### **Úrskurður dómstóls KSÍ**

Ár 2005, fimmtudaginn 2. júní er háð dómþing í dómstól KSÍ af Halldóri Frímannssyni dómara. Fyrir er tekið málið nr. 4/2005, Knattspyrnufélagið Fram gegn Umf. Grindavík.

### **Dómur**

Mál þetta er höfðað með kæru dagsettri 30. maí 2005 sem barst skrifstofu KSÍ sama dag. Kærandi er Knattspyrnufélagið Fram, Safamýri 28, Reykjavík og kærði Umf. Grindavík, Austurvegi 3, Grindavík.

### **I. Dómkröfur**

Þess er krafist að kæranda verði dæmdur sigur með markatölunni 3-0 í leik Fram og Grindavíkur í U23 B-deild karla, dags. 24. maí 2005 sem fram fór á Framvelli.

### **Málsatvik, málsástæður og lagarök kæranda**

“Þann 24. maí 2005 fór fram leikur á milli Fram og Grindavíkur í U23 liði B deild á Framvelli. Leiknum lauk með jafntefli 1-1. Samkvæmt meðfylgjandi leikskýrslu virðast tveir leikmenn kærða ekki hafa leikheimild með kærða þegar leikurinn fór fram. Þetta eru leikmennirnir Mario Mijatovic, kt. skráð 251080 og Mathias Jack, kt. skráð 150269. Þar sem ofangreindir leikmenn höfðu ekki leikheimild hjá kærða þá telur kærandi að um skýrt brot á hlutgengisákvæði reglugerðar KSÍ um knattspyrnumót, 1. mgr. greinar 1.2. sé að ræða, um að hlutgengir til þátttöku í knattspyrnumótum eru leikmenn sem eru félagar í því félagi sem þeir keppa með og uppfylla ákvæði reglugerðar KSÍ um félagaskipti leikmanna og stöðu félaga og leikmanna. Kærandi telur að ofangreindir leikmenn fullnægi ekki skýrum skilyrðum þessarar greinar, þar sem þeir eru ekki félagar í kærða og fullnægja ekki ákvæðum fyrrnefndar reglugerðar. Af fyrrnefndum sökum telur kærandi að lið kærða hafi mætt ólöglega skipað til leiks og með vísan til 1. mgr., greinar 4.3. í 4. kafla greinargerðar KSÍ um knattspyrnumót þá telst kærði hafa tapað leiknum með markatölunni 0-3. Með vísan til ofangreinds telur kærandi að dæma beri honum sigur í leik gegn kærða í U23 liði B- deildar með markatölunni 3-0.”

### **II.**

Hið kærða félag hefur fallist á kröfur kæranda í greinargerð sem dagsett er 31 maí sl. en þar segir orðrétt: "Okkur er og var ljóst að við spiluðum með ólöglega menn í þessum umrædda leik og ætlum ekki að halda upp neinum vörnum vegna þess, heldur eingöngu skýra hvers vegna við gerðum þetta vísitandi.”

### **III. Málsmeðferð**

Eins og mál þetta er vaxið sætir það flýtimeðferð skv. 8. grein laga um dómstóla KSÍ.

#### IV. Niðurstaða

Upplýst er í málinu og viðurkennt af hinu kærða félagi að leikmennirnir Mario Mijatovic nr. 17 á leikskýrslu og Mathias Jack nr. 19 á leikskýrslu voru ekki með gilda leikheimild með félaginu í leik liðanna sem fram fór 24. maí sl. Kærði hefur gengist við broti sínu og lýst því yfir að hann ætli ekki halda uppi vörnum í málinu. Af ofangreindu er því ljóst að kærði mætti með ólöglega skipað lið til leiks í leik liðanna sem fram fór 24. maí sl á Framvelli og lyktaði með markatölunni 1-1. Brotið varðar við 1. mgr. 4.3 í 4. kafla reglugerðar KSÍ um knattspyrnumót sem leiðir til þess að kærði dæmist tapa leiknum með markatölunni 3-0. Jafnframt er kveðið á um það í 3. tl. 4.4 í 4. kafla að lið sem mætir ólöglega skipað til leiks skuli sæta sekt að upphæð allt að kr. 24.000. Eins og mál þetta er vaxið þykir hæfileg sekt kr. 12.000. Kærði dæmist skv. þessu tapa ofangreindum leik með markatölunni 3-0 og skal kærði greiða kr. 12.000 í sekt til KSÍ.

#### **Dómsorð**

Úrslitum í leik Knattspyrnufélagsins Fram og Umf. Grindavík í U23 B-deild karla sem fram fór á Framvelli þann 24. maí sl. skal breytt þannig að Knattspyrnufélagið Fram dæmist hafa unnið leikinn með 3-0. Hið kærða félag Umf. Grindavík skal greiða kr. 12. 000 í sekt til KSÍ.

F.h. dómstóls KSÍ  
Halldór Frímansson